

PIRIPOSI Paoro Iokanatsopatakiti Piriposi Auakanimoni

¹ Nota Paoro, Tximótxio pakini, Kristo Xesosi nitiriakori iua amotakini atxaua. Niökatsopata ikini kākiti Kristo Xesosi nakitiakorimoni, Piriposi sitatxiti auakanimoni aiokanapireta. Niökatsopata hīte kōtākikarerinimoni, kotxi hīte ōtākikana Xesosi sākire auiākani. Hītepekana, kamiparīkarerini, niökatsopata hītemoni, kotxi hīte moianatana Xesosi sākire auiākani.

² Ereēkai hīte. Aīri Teoso, Xesosi Kristo Apiananiri pakini sikai ikinipoko erekari. Ninoa kamaerekaxiniretai.

Paoro Misākiretari Teoso Piriposi Auakani Īkapani

³ Hīte nixinikasaaki: “Erekapitikari aTeosone,” nitxa. ⁴ Teoso nimisākiretakasaaki hīte himakinika ĩkapani, nipoxokoniritika nimisākiretari Teoso. ⁵ Nipoxokoniuata, kotxi hīte miparīkatano nota Teoso iokanapirena erekari nisāpiretini ĩkapani, kotxi hīte iokanataro txineiro notamoni. Teoso iokanapirena erekari hāuikasaaki, hīpotorika himiparīkatinino. Eereka kona hīte iotokaika himiparīkatinino nota. Uatxa auapika himiparīkatinino nota. ⁶ Teoso sikari erekari hītemoni merepanika isākire hāuikasaaki, ininiā nota imarotapitikari Teoso sikari erekari hītemoni ikiniōtika. Ikara Teoso parīka hītemoni. Erekarī isikiniritika Xesosi kanapiriā ĩkorapokoriti. ⁷ Atāopitika nixinikinii hīte nipoxokoniritika, kotxi iteene nitiretai hīte himakinika. Atxiīti kateia āki naua. Atxiīti mapara naua, kākiti Teoso iokanapirena erekari atāo ininiua noerekini ĩkapani. Atxiīti nisāpiretari Teoso iokanapirena erekari, kākiti iteene imarotiniri ĩkapani.

Kateia āki nauakasaaki, mapara nauakasaaki, ikiniōtika hīte notakata apakapari ikinipoko erekari Teoso sikakiti.

⁸ Nota iteene tiretai hīte. Kristo Xesosi tiritinii atokokana nitiretai hīte. Teoso imarotari ikara nisākire atāo inini.

⁹ Nota misākiretari Teoso hīte ikapani ia atoko: Ninirekari hītiraōkiuatini apiaāpotini ikiniōtika. Hītiraōki aneeāpotakasaaki, ninirekari himarore apaka aneeāpotini. Imaroretxi himaroāpotakasaaki, ninirekari atāonoka himarotini. ¹⁰ Ikara atoko hininiā, himereēri apia erekari hīkamini. Ininiā maerekati ! hīkama. Maerekati na apanakinimoni ! hīkama. Ikara atoko hininiā, iposopeka hītixa Kristo kanapiriākasaaki. ¹¹ Ikara atoko hininiā, ikinipoko hīkamakiti erekari. Xesosi Kristonokara kamaerekatai hīte hīkamakiti ereka inini ikapani. Apanakini atamatakasaakiri erekari hīkamakiti, ninoa imarotari Teoso posotiire, ininiā eereka ninoa: “Peerekari Teoso,” itxanako.

Paoro Misiritiko Pirena

¹² Nitariakori, himarotari nota iteene misiritaāka. Iuaritika Teoso iokanapirena erekari iaripiretapeka. Ninirekari himarotini, nimisiritiko xika apikomoni kākiti imarotari Teoso iokanapirena erekari. ¹³ Ininiā nimisiritiko xika ikinika sotatoakori, Homanoakori auīte aapoko inīkatakani, ikinimane kākiti mapara auakani apaka imarotari nota uai kateia āki nauakasaaki Kristo sākire nisāpiretini xika. ¹⁴ Itori aītariakori Apiananiri sākire auīākani, sikataparaxiniretaāka, kotxi imarotarina Teoso nīkatinino nota kateia āki nauakasaaki. Ininiā ninoa sāpiretari Teoso sākire itaparaxinireritikana. Mapīkaretika itxana.

¹⁵ Ninoa sāpiretari Kristo sākire, kotxi inirekarina erekari ikaminina. Txamari apanakinipekana sāpiretari Kristo sākire nota xikotiko xika. Inirekarina kākiti auikiniri ninoaka sākire, nota sākire poiāoka auikinina

ĭkapani. Ninoa sãpiretari Kristo iokanapirena, kotxi ninoa potxitari kãkiti taparakienatakakiniua. ¹⁶ Aĩtariakori, erekarinani nirekakani, sãpiretari Kristo iokanapirena, kotxi ninoa tiretano nota. Ninoa imarotari Teoso sikinino nota ia parĩkatxi, Teoso iokanapirena erekari atão inini noerekini ĭkapani. ¹⁷ Nota xikotakani sãpiretari Kristo sãkire, txamari inirekarina ninoaka nireẽkiti ikaminina. !Inirekarina Teoso nireẽkiti. Inirekarina nota apia atatsi-itiniri nimisiritiko uai kateia ãki nauakasaaki.

¹⁸ Atxiĩti Kristo iokanapirena sãpiretakani ãkixinire erekari. Atxiĩti ninoa ãkixinire kona erekari. Iuaritika erekapitikari, kotxi Kristo iokanapirena sãpiretapeẽkaika. Ininiãkara nipoxokoniuata nota. Ari, !niotokapani nipoxokoniuatini. ¹⁹ Nipoxokoniuata, kotxi nimarotari nitakanapiniri kateia, kotxi hĩte misãkiretari Teoso nota ĭkapani. Nimakatzakaãkako kateia ãki, kotxi Erekari Matamatakoti Xesosi Kristokata auakari moianatano nota. ²⁰ Kona ninirekari nipẽtauatini, Kristo iokanapirena nisãpiretakasaaki. Ninirekari kataparaxinire ninini, Kristo apanakini nisãpiretini ĭkapani. Ikara atoko nininiã, apanakini imarotari Kristo Apiananiri ininiua. Ikiniõtika nauapanika ninakasaaki, ninirekari kãkiti imarotiniri Kristo Apiananiri ininiua. Ari, nipĩkasaaki apaka, ninirekari apanakini imarotiniri Kristo Apiananiri ininiua. ²¹ Auapanika ninakasaaki, ninirekari Kristo nireẽkitinoka nikamini. Erekapitikari nipinini, kotxi eereka Kristokata nauapika. ²² Auapanika ninakasaaki, niparĩkauatapitipo Teoso sãkire nisãpiretini, ininiãkara erekari niparĩka. Kipa ninireka? Nota auapanika nininikani? Nipininikani? !Nimarotari ninireẽkiti. ²³ Ninirekari auapanika ninini. Apaka ninirekari nipinini. Apiata ninirekari nipinini Kristokata nauini ĭkapani. Ikara atoko apiaerekata. ²⁴ Txamari hĩte noerekini ĭkapani, ninirekari auapanika ninini, kotxi hĩte

nirekapanikano nota. ²⁵ Ikara nimarotapitika, ininiã auapanika nitxa, himakinika noerekini ïkapani, kotxi nota nirekari himaroãpotiniri Teoso sãkire. Ninirekari hãuikiniri hïpoxokoniritika. ²⁶ Ininiã eereka hïtxari: “Erekapitikari Kristo Xesosi, kotxi Paoro iuaïkana apoka atemoni,” hïtxapaniko. Ininiã iteene hïpoxokoniuaata iuasaaki.

²⁷ Atxiïti auapanika nitxa, atxiïti nipina, iuaritika ikiniõtika ereka hïtxako hãuini. Erekaru Kristo iokanapirena, ininiã hïte apaka ereka hïtxako hãuini. Atxiïti nisa hïtemoni. Atxiïti kona nisa. Atxiïti nikenakopiretai hïte uai kateia äki nauakasaaki. Iuaritika, hãuini ereka inakasaaki, nimarotariko hïte himakinika iteene auikiniri Kristo sãkire iua iokanapirena erekari. Hãuini ereka inakasaaki, nimarotari hïte himakinika sãpiretiniri Kristo iokanapirena iaõka apanakinimoni. ²⁸ Hãuini ereka inakasaaki, na hïpïkana hïte omanatakani. Hïtparaxiniriritika hãuiniã, ninoa hïte omanatakani imarotari ixipokinina äti õti. Hïtparaxiniriritika hãuiniã, ninoa imarotari Teoso makatxakinii hïte himapinakani ïkapani. ²⁹ Ininiã Teoso sikari erekari hïtemoni, kotxi iua auiritai hïte auikiniri Kristo iokanapirena. Apaka erekari isikai hïte, kotxi iua auiritai hïte atatsiitiniri himisiritiko Kristo ïkapani. ³⁰ Hïte atamatapekari nota misiritiko, hïte sauaki nauakasaaki. Hïkenakopiretari nimisiritiko auapanika uatxa. Uatxa hïte nota atoko, kotxi hïte apaka misiritaãka.

2

Kristoka Poiãotakaua.

¹ Kristo sikataparaxiniretaua ate, iua nakiti aniniãua. Kristo mïkapiritaua ate, amarini axapitiri inoro mïkapiritini atoko itxa, kotxi iua tiretaua. Ätipirika iua Erekaru

Matamatakoti amoianari itxaua. Kristo iteene tiretaua. Iua amonikaua. ² Ininiākara nota ôtākikai hīte hīkinika. Hīxinikariko Teoso nireēkitinoka hīkamini, ininiā hīxinikakiti ātinoka txauako. Hītiretakauako Teoso tiretiniua atokokana. Hinireēkiti ātinoka txauako. Ikara atoko hininiā, iteene hīkamapoxokonitano nota. ³ Kona kapotxinaniri hītẁapeua. !Hīuikapeua. Hīteka minakati hītẁauako. Hīxinikariko: “Apanakini apiata, nota poiāoka”. ⁴ !Hīxinikapiri pite nireēkitinani. Himiparīkatanako apanakini, ninoa nireēkiti ikaminina īkapani.

⁵ Xesosi Kristo xiniākitikanerako hīxinikako. Kristo kamakitikanerako hīkamako. ⁶ Teoso itxaua Kristo Xesosi, ininiā iposotari ipaniātiniri ikinimane inireēkiti ikaminina. ⁷ Iuaritika itakanapari auītetxi ininiua. Nitiritxi atoko itẁapekaua. Iuaka minakati itẁikitakaua, kotxi kākitipeka itxaua uai itixi iponaniākasaaki. ⁸ Iuasaaki kiki inakasaakia, iuaīkana iuaka ipoiāotakaua, kotxi ikīpitari Teoso sākire ipinini īkapani. Imarotari okiko tīkane, kokaniri okiko atoko inaākako aamina ipiriāmitakari nopini. Iuaritika ikīpitari Teoso sākire ipinini īkapani. ⁹ Ikara atoko ininiā, Teoso txīkitakari iua Apiananiri ininiāua. Āti iua atoko inakari !auari. Teoso takari iuāka. Āti uāka iua atoko inakari !auari, ¹⁰ kotxi kākiti ikininape kenakotakasaakiri iuāka Xesosi, ikapotoreēkauako Xesosi apisatoō. Ikinimane Teoso tixine auakani, ikinimane itixi auakani, ikinimane ipīkani auiniātaā pakini kapotoreēkauako Xesosi apisatoō, kotxi iauītena itxaua Xesosi. ¹¹ Ikinipoko kākiti txako: “Xesosi Kristo Apiananiri itxaua,” itẁanaxo. Ikara atoko ininiā ikinimane: “Peerekari aīri Teoso,” itẁanaxo.

Iōriki Atoko Hītẁaxo

¹² Ininiā nota tiretakini, hīkīpitariko nisākire uatẁa, mitxi hītekata nauakasaaki nisākire hīkīpitini atokokana

hītxako. Uatxa kona hītekataikano, iuaritika ninirekari apiata hīkīpitiniri nisākire. Teoso makatxakapekari hi-maerekani itixine hīsini īkapani, ininiākara ikiniōtika hīparīkauatako Teoso īkapani. Hīpīkariko maerekati hīkamini. Erekarinanira hīkamapikako. ¹³ Hīposotari ikara atoko hīkamini, kotxi Teosokara moianatai hīte. Iua kamanirekaretai hīte iua nireēkiti hinirekini īkapani. Iua sikaposotiiretai hīte iua nireēkiti hīkamini īkapani.

¹⁴ Hīparīkauatakasaaki, !hītsoatape, !hītxitakakapeua. ¹⁵ Ikara atoko hīkaminiā, hīkerokiniri !uari, himaerekani !uari, ininiā erekarinoka hīkama apanakinimoni. Ininiā Teoso anaakori erekarini hītxaua. Kākiti kamisirienererini sauaki hāuanāta hīte. Kākiti maerekani sauaki hāuanāta. Iōriki iopinikari iaxiti īkanōka. Iōriki atoko hītxako. Hīopinikariko maerekati auiniātaā, atāo inakari kākiti imarotini īkapani. ¹⁶ Hīte iopinikari ipiā, Teoso sākire apanakinimoni hīsāpiretakasaaki. Teoso sākire txīkitakari kākiti ātipirika auāki inini tīkane, Teosokata auini īkapani. Hīte Teoso anaakori erekarini hininiāua, nota iuikaiko hīte, Kristo uaimoni kanapiriākasaaki, kotxi hīte auikapekari Teoso sākire nisāpiretakiti. Kona maxikatīikani nīparīkauatapitipo hīte īkapani, kotxi hīte auikapekari Teoso sākire nisāpiretakiti.

¹⁷ Atxiīti nota okaāka Teoso sākire nisāpiretini xika. Atxiīti niarēka oxikepoakataāka, Teosomoni sikakori atoko inakari, Teoso sākire nisāpiretinii xika, Teoso sākire hāuikini xika. Nokaāka atxiīti, iuaritika nīpoxokoniuaata. Nīpoxokoniuaata hītekata. ¹⁸ Ininiā erekari hīte apaka poxokoniuatini. Erekarini hīpoxokoniuatini notakata.

Tximótxio Pirena

¹⁹ Xesosi Apiananiri nirekiniāri nota iokanatiniri Tximótxio hītemoni, ininiā mapaōtipeka inakasaaki niokanatarini iua. Ininiā eereka iua minapiretari hīte

pirena, nota apaka poxokoniuatini ĩkapani. ²⁰ Āti Tximótxio atoko inakari uai ! auari, kotxi iua iteene tiretai hĭte. Iua nirekari hāuini ereka inini. ²¹ Apanakini kākiti xinikari ninoaka nireēkitinoka. ! Ixinikarina Xesosi Kristo nireēkiti. ²² Himarotari iua Tximótxio parĭkauatape notakata, imi irikata parĭkauatakari atoko itxa. Iparĭkauata notakata Teoso iokanapirena erekari apanakini asāpiretini ĩkapani. Ininiākara himarotari Tximótxio atamakaākapeka, ininiā himarotari erekapitikari iua. ²³ Kiatokopa ninataāka? Uatxa ! nimarotari. Nimarotakasaakiri, niokanatarari Tximótxio hĭtemoni. ²⁴ Apiananiri kamaimaroretano nota, Tximótxio tikinimoni nota apaka apoka ereē hĭtemoni.

Eparotxito Pirena

²⁵ Notamoni erekari iuaĭkana niokanatiniri hĭokanapirena mĭkari, Eparotxito inakori. Hĭte iokanatapekari iua notamoni nota itiretini ĩkapani. Iua nitari atoko itxa. Imiparĭkatapitipono nota, Teoso iokanapirena asāpiretakasaaki. Iua, nota pakini sotato atoko atxaua, kotxi ate neenamauata Teoso ĩkapani. ²⁶ Iua ipiātai hĭte hĭkinika. Iua maerekaxiniretinoka itxa, kotxi ikenakopiretari hĭte imaropiretiniri iua amianatini. ²⁷ Atāopitikara iua amianatpitika. Iua ipinaarita, iuaritika Teoso amonĭkari iua. Itxĭkitakari iua iuaĭkana ereka inini. Ininiā Teoso amonĭkano nota apaka, kotxi Eparotxito ipinaākamako, apia maerekaxiniretinoka nitxamako. ²⁸ Ininiākara iteene ninirekari niokanatiniri iua hĭtemoni, hĭpoxokoniuatini ĩkapani haōkitakasaakiri. Ikara atoko ininiā, nota maerekaxiniretinoka ninini ! auai. ²⁹ Ininiā hĭpoxokoniritika hāpakapariko iua, kotxi iua Eparotxito aĭtari itxaua, kotxi Apiananiri nakitiakori atxaua. Hĭpaxitariko kākiti Eparotxito atoko inakari, ³⁰ kotxi Kristo ĩkapani iparĭkauatini xika ipinaarita. Iuaka monōkorimoni isa nota imoianatini

ĭkapani, kotxi iua imarotari hĭte nirekapitikamari himoianatinino, txamari ! hĭposota himoianatinino, ininiã iua iteene moianatano.

3

Kiatokopa Kãkiti Atão Ereka Inini?

¹ Nitariakori, apikomoni nisãpiretai. Hĭpoxokoniuatato, kotxi Apiananiri nakitiakori atxaua. !Nisãpaka iuaĭkana nisãpiretakitipeka nisãpiretinii hĭte. Iuaĭkana nõtãkikai hĭte, atão minakati himauikakani ĭkapani.

² Erepaniko kãkiti maerekati kamakani, atão minakati sãpiretakani, kotxi ninoa sãpiretari kãkiti: “Teoso takaõtxikare piĭtoã mauakaniã, kona Teoso nakiti ! pitxaua,” itxana. ³ Ninoa auapitika Teoso takaõtxikare iĭtoãna, txamari kona Teoso nakitiakori !itxauana. Atera Teoso nakitiakori, kotxi atemoni aua atão inakari Teoso takaõtxikare ate ãkixinireẽ, kotxi Erekar Matamatakoti oerekaua amisãkiretiniri Teoso. Kristo Xesosinokara ate iuika. Aimarotari ateka kamakiti ! itxa. Teoso kamakitinokara apakata.

⁴ Hĭuãkatari atxiĭti hĭte kamakiti ereka inini Teoso apakapinii ĭkapani? Konapitini. Nota kamakiti apiarekata, iuaritika nikamakiti !txĭkitakano Teoso apakapinino ĭkapani. Hĭkenakotariko erekari nota kamakiti:

⁵ Teoso takaõtxikare niĭtoã takaãka oito õti nauakasaaki. Nirini, ninoroni pakini Xoteo itxauana. Natokiri kitxakapirĭka Pẽxamiĭ inakori. Kitxakapirĭka natokiriakorini, nakiroakoroni pakini ikinika Xoteoakori itxauana, ininiã atão Xoteo nitxaua. Nota kĭpitari aãuĭteakori kitxakapirĭkarini paniãtakiti, kotxi nota pariseo nitxaua, ininiã Teoso sãkire iõkatsopatakori oerekakari nitxaua.

⁶ Nota iteene nirekari Teoso nireĕkiti nikamini, ininiã nimisiritari kãkiti Xesosi sãkire auiãkani, kotxi niuãkatari Teoso nirekari ikara nikamini. Aãtokiriakorini paniãtakiti ikinika nikĭpita. !Nikerokari.

⁷ Mitxi niuãkatari ikara atoko nininiã erekapitikari, ininiã, “Teoso apakapapitikano nota,” nitxa. Uatxa nimarotari Kristo, ininiã nimarotari mitxipe minakati nininiuua nota. ⁸ Uatxa nimarotari niauïte Kristo Xesosi. Ikara apiaerekata. Xesosi nimarotini apisapanika, nika-makiti !itxa xatiki. Nitakanapapekari mitxi nikamakiti. ! Itxaika. Mitxi nikamakiti itiki atoko, kotxi !niniurekaikari. Kristo nakiti uatxa nitxaua. ⁹ Nitakanapapekari mitxi nikamakiti Kristokata ãtipirika nauini ïkapani. Nota kïpitari Moisesini paniãtakiti. Ikara atoko inakarinani kona ereka txïkitakano nota. Teosonokara kamaerekatano nota, kotxi nauikari Kristo sãkire. ¹⁰ Ninirekari Kristo iteene nimarotini. Ninirekari nimarotiniri Teoso posotire, kotxi iposotiireë õkitikari Kristo, iuaïkana auãki inini ïkapani. Kristo atatsiirauatape, ininiã nota apaka nirekari natatsiirauatini atão imoianari nininiuua ïkapani. Ninirekari nota nireëkiti ipinini, Kristo aamina ïpiriãmitakari nopini ipinini atoko. Ninirekari Xesosi nireëkitinoka nikamini, ininiã iua atoko nitxaua. ¹¹ Ininiã itixi xipokini õti Teoso õkitikanoko, iuaïkana auãki ninini tïkane.

Mitekakari Atoko Nitxa

¹² Ikara ikinika ! nimarotapanika. Nimaroãpota-panikariko. Teoso kamapanikari iparïka nota ãkixinireë. ! Ixipokapanikari, ininiã ! niotokakari niparïka Teoso ïkapani. Niparïkauatapitipo. Mitekakari mitekini atoko, ! niotoka. Mitekakari nirekari mitekaxi mapotõkire apokini. Iua atokokana nota nirekari niparïka mapotõkire napokini, kotxi Kristo Xesosi mereëno nota ikara atoko nikamini ïkapani. ¹³ Nitariakori, niparïka mapotõkire ! napokapanika. Ia nikamako: ! Nixinikaikari mitxi nikamakiti. Mitekakari masapotorikakati atoko nitxa. Nitapararitika nisa apikomoni, niparïka mapotõkire napokini ïkapani. ¹⁴ Mitekakari iteene nirekari mitekaxi

mapotōkire apokini imitekini ĩki apakapini ĩkapani, ininiã imitekapitipo. !Iotoka. Iua atokokana nota parĩkauatapitipo Teoso ĩkapani, niparĩka mapotōkire napokini ĩkapani, niparĩka ĩki Teoso sikakiti napakapini ĩkapani, kotxi Teoso pĩkapiretano nota Kristo Xesosiã itixine nisini ĩkapani, niparĩka ĩki napakapini ĩkapani.

¹⁵ Akinika ate Kristo iteene imarotakani xinikamariko nota oerekakiti atoko inakari. Ikara atoko himaxinikakanisaaki, Teoso oerekaiko hĩte atão inakari. ¹⁶ Mitekaxi kamakari paniãtakiti iaōka mitekakari kama imitekasaaki. Iua atokokana makamariko Teoso paniãtakiti. Uatxaika akamakiti atokokana makama.

¹⁷ Nitariakori, hĩkamarike nota kamakiti atoko inakari, kotxi ate oerekapekai hĩte ikara atoko inakari hĩkamini. Hĩkĩpitariko nota kamakiti atoko inakari kamakani sãkire.

¹⁸ Kaiãopokori kãkiti !auikari Kristo ipinini amaerekani imaktxakini ĩkapani. Kristo omanatakani itxauana nino. Itokatapeka ikara nisãpiretai hĩte, ininiã iuaĩkana uatxa ikara nisãpiretai. Iteene nimatinaniuata ninoa xika. ¹⁹ Itixi mapotōkire õtisaaki ninoa iokanataãkako maerekani misiritikoãtaã. Iĩtona iteasonena atoko itxana, kotxi iĩtona nireẽkitinoka ikamana. Ikamakitina !erekari, iuaritika iuikarina ikamakitina. !Ipẽtauatana. Ninoa xinikapikari ĩkorapokoriti. !Ixinikarina Teoso.

²⁰ Atepekana, Teoso tixine auakani atxapekaua. Aiãtapari apoxokoniritika kãkiti maerekani makatxakakari iuaxitikiri uaimoni apokini. Iua Xesosi Kristo Apiananiri itxaua. ²¹ Iuusaakiko inoãkari aĩto mataparati. Itxĩkitakari aĩto iua ĩto erekari atoko inini. Iposotari, kotxi kaposotireri itxaua iua. Ikinimane kamapitikariko ipaniãtakiti, kotxi kataparari iua Xesosi.

4

Õtãkipirenatxi

¹ Nitariakori, nota iteene tiretai hīte. Nipiātai hīte. Hīkamapoxokonitano nota. Niuikai hīte, kotxi niparīka īki atoko hītxa. Nitiretakini, hīxinikariko ikara nota ōtākikiniū uatxa. Nota ōtākikiniū hīkīpitiniā, !hītakanapari Apiananiri.

² Nota ōtākikai hīte Epótxia inakoro, Sītxiki inakoro pakini. Hīkīpitariko Apiananiri sākire. Hīotokakariko hītxitakakiniua. ³ Pitepekana nimoianari erekari, nota nirekai pite ōtākikinina naia sito ipi, kotxi ninoa parīkau-atapeka notakata Teoso iokanapirena erekari asāpiretakasaaki. Ninoa parīkauata notakata, Kremētxi inakori pakinikata, apanakini nimoianariakorikata apaka. Ninoa uāka Teoso aātsopateē iōkatapeēkaika, Teosokata auap-ininiika ininina tīkane.

⁴ Hienenīkapikako, kotxi Apiananiri nakiti hītxa. Iuaīkana nitxai. Hienenīkako.

⁵ Erekari hīkamako apanakinimoni. !Hītxitapena. Erekari apanakini imarotiniri hīte ereka hinini. Apiananiri kaimapeka ikanapiriini uaimoni. ⁶ Na xatiki maerekaxiniretika ! hītẓape. Maerekaxinireti hinakasaaki, himisākiretariko Teoso. Hamanaāri hinireēkiti. Himisākiretakasaakiri Teoso, hītẓariko: “Erekapitikari notamoni pikamakiti,” hītẓariko. ⁷ Ikara atoko aniniā, Teoso kamaerekaxiniretaua. Kiātokopa ininiāpa Teoso kamaerekaxiniretaua? !Kimarotikori, iuaritika peerekari. Hākixinire erekaxinirepeka ininiā, maerekati !īroā hākixinireē. !Hinirekaikari maerekati hīxinikini. !Hinirekaikari maerekati, kotxi Kristo Xesosi nakiti hītẓapekaua.

⁸ Nitariakori, nisāpiretakiti xipokini apisa, nisāpiretapanikaiko hīte. Hīxinikariko atāo inakari sākiretxiti. Hīxinikariko atāo inakari hīsāpiretini. Hīxinikariko atāo inakari hīkamini. Hīxinikariko erekarinoka. Hīxinikariko

tiraõkitxi. Hĩxinikariko potxitakori. Ikara atoko inakari-noka hĩxinikako, kotxi erekapitikari ikara. Peerekari ikara. ⁹ Hĩkamapikariko noerekakiti iaõka. Hĩsãpiretanako apanakini hĩtemoni nisãpiretakiti. Hĩkamariko nota kamakiti hĩtiãkiti atokokana. Ininiã Teoso kãkiti kamaerekaxiniretakari kaikota hĩtekata.

Paoro Potxitari Ninoa Sikakiti

¹⁰ Apiananiri nakiti nitxaua, ininiã iteene nipoxokoniuaata. Iuaĩkana hĩte oerekari hĩtiretinino, txineiro hĩsikakito hĩokanatinano, ininiã nipoxokoniuaata. Ātipirika hĩxinikano, kotxi iteene hĩtoretano. Txamari mitxi !hĩposotari hĩsikakiti hĩokanatinani notamoni. ¹¹ ! Namanaãi iuaĩkana txineiro hĩokanatinani notamoni. Ikinipoko ninireẽkiti auakasaaki, nipoxokoniuaata. Ikinipoko ninireẽkiti mauakanisaaki, iuaritika nipoxokoniuaata. ¹² Nota napapekari nimamãkani, nimanipokoreni, nimatxineiroteni pakini. Apaka nimarotari ātikataã ninireẽkiti ikinipoko auinano. Teoso oerekapekano ikiniõtika nipoxokoniuatini. Nienenĩka nipokori auakasaaki. Nienenĩka ninatxitakasaaki apaka. Nienenĩka ikini sereti auinakasaakino. Nienenĩka minakati mauinakanisaakino. ¹³ Ikinipoko niposota nikamini, kotxi Kristo sikano iposotiire.

¹⁴ Erekapitikai hĩte, kotxi nimatxineirotenisaaki, hĩokanatarĩ txineiro notamoni. ¹⁵ Teoso iokanapirena erekari merepitipanika hĩkenakotakasaaki, ereẽ Masetónia tixini nosipikasaaki, hĩte Piriposi auakaninokara iokanataro txineiro napakapini ikapani. Apanakini Xesosi sãkire auiãkani ātiãtaã auakani, ! iokanatinano nota. Himarotapekari ikara. ¹⁶ Tesarónika sitatxiti nauakasaaki, ninirekakiti auakasaaki, itokata txineiro hĩokanatinano. ¹⁷ !Niãtaparo txineiro hĩsikinino. Niãtapari Teoso sikinii erekari, kotxi hĩte tiretapekano

nota. ¹⁸ Napakapapekari ikinipoko hōkanatakiti. Kaiāopokori hōkanatakiti. Epararotxito inakori mininano hīsikakiti, ininiā ikinika ninireēkiti uatxa auinano nota. Teosomoni sikakori kamariri atoko itxa hīte sikakiti notamoni. Teoso potxitari hīsikakiti notamoni. ¹⁹ NiTeosone sikaiko hīte hinireēkiti ikini sereti, kotxi ikinipoko aua iuamoni. Isikaua, kotxi Kristo Xesosi nakitiakori atxaua. ²⁰ Ātipirika matxari Teoso: “Peerekai aīri, aTeosone. Ameē.”

Takanapapirenatxi

²¹ Hīsāpiretanako ikinimane ereē auakani Kristo Xesosi nakitiakori, nixinikamanapitinina ninoa. Aītariakori uai notakata auakani xinikamanapitai hīte apaka. ²² Ikinimane uai auakani Teoso nakitiakori iokanapireta hītemoni ixinikiniina. Homanoakori auīte aapoko auakani, Teoso nakitiakori, iokanapireta hītemoni iteene ixinikiniina.

²³ Xesosi Kristo Apiananiri sikari ikinipoko erekari hītemoni. Ameē.

Teoso sãkire ameneri New Testament in Apurinã (BR:apu:Apurinã)

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 19 Oct 2021 from source files dated 19 Oct 2021

253eaec7-f0c7-5b49-b6be-65ee5354d0ed